

# Dasar Pembangunan PKS dan Keusahawanan

Sepanjang satu dekad yang lalu, pembangunan PKS dan keusahawanan telah diketengahkan menerusi penubuhan Majlis Pembangunan PKS Kebangsaan (MPPK). Inisiatif, termasuk pembangunan institusi dan rangka kerja yang berstruktur telah diperkuuhkan lagi dengan pelaksanaan Pelan Induk PKS yang telah menyediakan asas ke arah pembinaan ekosistem yang komprehensif bagi PKS. Dasar dalam Model Baru Ekonomi (MBE), Program Transformasi Ekonomi (*Economic Transformation Programme*, ETP) dan Rancangan Malaysia Kesepuluh dan Kesebelas adalah konsisten, memberi tumpuan kepada peranan PKS dalam mengukuhkan pertumbuhan ekonomi dan mencapai agenda keterangkuman. Pelan Induk PKS membawa dimensi baharu kepada pembangunan PKS, memperkenalkan perkongsian awam-swasta serta kemudahan end-to-end, seterusnya merangsang pertumbuhan melalui produktiviti dan inovasi bagi meningkatkan sumbangan PKS kepada ekonomi. Oleh itu, walaupun dengan persekitaran ekonomi yang mencabar, PKS terus berkembang pada kadar yang tinggi berbanding firma besar.

Melangkah ke hadapan, liberalisasi perdagangan berterusan melalui Komuniti Ekonomi ASEAN (*ASEAN Economic Community*, AEC) dan Perjanjian Perkongsian Trans-Pasifik (*Trans-Pacific Partnership Agreement*, TPPA) dijangka membuka ‘lembaran baharu’ kepada peluang pasaran dan akses kepada sumber yang lebih banyak. Pada masa kini juga, gangguan teknologi berlaku dengan kehadiran *big data*, robotik dan pengkomputeran awan serta aliran mega yang lain. Memandangkan Malaysia sedang melangkah ke fasa terakhir dalam perjalanan mencapai status negara maju, adalah penting bagi PKS untuk menangani cabaran ini dan mencari aliran baharu dalam Revolusi Perindustrian Keempat sekaligus mencipta laluan kepada PKS untuk memainkan peranan penting sebagai pemacu pertumbuhan utama negara.

## MAJLIS PEMBANGUNAN PKS KEBANGSAAN DAN INISIATIF UTAMA

Sejak penubuhannya pada tahun 2004, **Majlis Pembangunan PKS Kebangsaan (MPPK)** terus memacu pembangunan PKS di Malaysia dengan menetapkan hala tuju yang strategik dan menggubal dasar bagi meningkatkan pertumbuhan PKS dalam semua sektor ekonomi. Sebagai badan membuat dasar tertinggi, MPPK memainkan peranan yang penting dalam mempromosi pendekatan menyeluruh dan bersepada dalam pembangunan PKS. MPPK telah mencatat pencapaian yang ketara, termasuk mengguna pakai definisi PKS kebangsaan, membangunkan pangkalan data dan statistik PKS, memantau dan menganalisa prestasi PKS bagi tujuan penggubalan dasar, memperkemaskan penyebaran maklumat mengenai PKS, membangunkan insfrastruktur kewangan PKS dan menyokong penggubalan Pelan Induk PKS. Hasilnya, PKS telah berkembang dengan baik sejak beberapa tahun dengan sumbangannya kepada keluaran dalam negeri kasar (KDNK) menunjukkan peningkatan yang stabil daripada 29.6% pada tahun 2005 kepada 36.3% pada tahun 2015.

Rancangan Malaysia Kesepuluh (RMKe-10) dari tahun 2011 sehingga 2015 adalah penting dalam menyediakan landasan bagi transformasi ke arah menjadi sebuah negara berpendapatan tinggi. Adalah penting bagi menyelaras pembangunan PKS dengan aspirasi yang besar ini dan mengambil maklum bahawa tujuan utama di bawah RMKe-10 adalah untuk membangunkan PKS sebagai pemacu pertumbuhan dan inovasi. Ini adalah tunjang yang mendorong Pelan Induk PKS. Pelan ini meletakkan pelbagai strategi, matlamat, langkah-langkah dan program bagi mewujudkan persekitaran yang kondusif untuk mengubah PKS menjadi pemacu pertumbuhan baharu. Fokus utama adalah meningkatkan kemudahan dalam menjalankan perniagaan; akses kepada pembiayaan dan pasaran; mempromosikan pembangunan modal insan dan keusahawanan serta memupuk PKS yang inovatif.

Objektif utama **Pelan Induk PKS (2012-2020)** yang diperkenalkan pada Julai 2012 adalah bertujuan membawa PKS ke tahap yang lebih tinggi dengan meningkatkan sumbangannya kepada KDNK kepada 41% menjelang tahun 2020. Pelaksanaan Pelan tersebut kini berjalan lancar dan beberapa bidang sudah menunjukkan hasil, terutamanya dalam inovasi dan peningkatan kemudahan dalam menjalankan perniagaan. Pelan Induk PKS menjadi asas kepada pembangunan PKS dalam Rancangan Malaysia Kesebelas (RMKe-11), yang kini berada pada tahap terakhir ke arah mencapai negara berpendapatan tinggi. Pelbagai pembaharuan dasar sedang dijalankan, dengan itu, PKS perlu membuat pelarasan dan pengubahsuaihan operasi perniagaan supaya kekal berdaya saing. Kerajaan melalui SME Corp. Malaysia sebagai agensi yang bertanggungjawab untuk menyelaras dan memacu Pelan Induk PKS menumpukan fokus kepada pelaksanaan enam Program

Berimpak Tinggi (HIP) yang penting bagi kejayaan Pelan tersebut. Pada masa yang sama, Pelan tersebut menyenaraikan 26 langkah bantuan lain bagi mengukuhkan ekosistem yang dilaksanakan.

Dengan mengambil kira perubahan keadaan ekonomi dan statistik termasuk pengenalan kepada definisi baharu PKS pada tahun 2014, sasaran makro yang ditetapkan di bawah Pelan Induk PKS telah diselaraskan pada tahun 2015. Sasaran bahagian PKS kepada KDNK bagi 2020 kekal pada 41%. Dalam pada itu, sasaran sumbangan PKS kepada guna tenaga menjelang 2020 dinaikkan kepada 65% daripada 62% terdahulunya, manakala bahagian eksport PKS telah dikaji semula kepada 23% daripada 25% sebelum ini.

## MAKLUMAT TERKINI MENGENAI PELAN INDUK PKS (2012-2020)

Pada mesyuarat MPPK Disember 2015 dan Jun 2016 yang lalu, perbincangan tertumpu kepada kemajuan Pelan Induk PKS. Pencapaian awal juga telah dikenalpasti dalam beberapa program. Sebagai contoh **Platform Pengkomersialan Teknologi (TCP) – HIP 2** yang dilaksanakan oleh Agensi Inovasi Malaysia melalui subsidiarinya, PlatCOM Ventures Sdn. Bhd. telah berjaya membawa lapan produk inovasi baharu ke pasaran. Beberapa produk ini dianggap sebagai inovasi perintis dan *game changer* dalam industri masing-masing.

Program ini yang bermula pada Mei 2014 telah melepas sasaran yang ditetapkan pada tahun 2015 iaitu 63 Harta Intelek (*intellectual property, IP*) telah dipindahkan ke industri untuk tujuan pengkomersialan berbanding dengan 23 yang disasarkan pada awalnya. Program ini juga membantu dalam pengkomersialan 5 inovasi pada tahun lepas berbanding 2 pengkomersialan inovasi yang disasarkan. Sehingga Ogos 2016, program tersebut telah menyaring lebih daripada 776 projek inovasi dan daripada itu, 88 telah diluluskan dan sejumlah 110 lesen perjanjian telah ditandatangani. Pada tahun 2016, TCP telah melaksanakan *Dengue Tech Challenge* yang melibatkan 14 inovasi dalam diagnostik, rawatan, kawalan vektor, vaksin dan penyelesaian kesedaran selain daripada *Halal Hi-Tech Challenge* yang merupakan usaha kebangsaan untuk menggalakkan inovasi Malaysia bagi membantu meningkatkan industri Halal melalui perkongsian strategik dengan Agensi Inovasi Malaysia (AIM), SME Corp. Malaysia, Jabatan Kemajuan Islam Malaysia (JAKIM) dan Perbadanan Pembangunan Industri Halal (HDC).

**Program Inovasi Inklusif (HIP 6)** yang dilaksanakan oleh Yayasan Inovasi Malaysia (YIM), sebuah agensi di bawah Kementerian Sains, Teknologi dan Inovasi (MOSTI) telah diwujudkan bagi membantu kumpulan 40% terendah dalam piramid pendapatan (B40). Sejak program ini dilaksanakan, sebanyak 262 inovasi dari pelbagai sumber telah diterima dan 22 inovasi telah disenarai pendek di bawah program ini. Pada masa ini, sejumlah enam projek kini sedang dibangunkan, antaranya Penapis Air Bergerak, Trak

Pelbagai Guna, Sopa Dibbling Machine, Hidro Mikro (*Micro Hydro*), Mesin CNC dan Mesin Pengasingan Padi. Selain itu, terdapat juga 11 projek baharu yang lain dalam perancangan melalui Cabaran Inovasi Inklusif.

Sementara itu, 111 PKS telah meraih manfaat dengan menyertai **Program Going Export (HIP 4)** yang diuruskan oleh Perbadanan Pembangunan Perdagangan Luar Malaysia (MATRADE) bagi mengantara bangsa PKS yang sedia untuk mengeksport. Syarikat-syarikat ini telah berjaya menerima kontrak berpotensi jualan eksport yang berjumlah lebih daripada RM14.5 juta.



Bagi segmen BioNext di bawah **Program Pemangkin (HIP 5)**, iaitu program yang dilaksanakan oleh SME Corp. Malaysia dengan kerjasama Malaysian Bioeconomy Development Corporation Sdn. Bhd. (Bioeconomy Corporation), sebanyak 10 syarikat telah berjaya mengikuti *Oxford Accelerator Programme* dan sedang dalam proses melaksanakan pelan tindakan yang direka secara khusus bagi membantu mereka untuk menjadi syarikat pertumbuhan tinggi. Melangkah ke hadapan, bagi tahun 2016, tumpuan adalah bagi tiga subsektor iaitu peralatan perubatan, minyak, gas & tenaga, dan pembinaan & pemberian kapal.

Bagi projek **HIP 1** yang diterajui oleh Unit Pemodenan Tadbiran dan Perancangan Pengurusan Malaysia (MAMPU), iaitu inisiatif untuk menyediakan kemudahan bagi menjalankan perniagaan ke arah mewujudkan satu gerbang tunggal dalam pendaftaran dan pelesenan perniagaan sedang dilaksanakan secara berperingkat. Di antara pencapaiannya adalah portal informasi iaitu Portal MalaysiaBiz yang telah dilancarkan secara rasminya oleh YAB Perdana Menteri pada 23 Jun 2016. Portal ini boleh diakses oleh orang ramai di <http://malaysiabiz.mampu.gov.my>. Sehingga Mei 2016, sebanyak 1,917 lesen pada peringkat Persekutuan dan 10 agensi negeri telah dimuat naik ke dalam portal tersebut bagi 1,174 aktiviti merentasi semua sektor ekonomi. Portal informasi pendaftaran dan pelesenan perniagaan dari seluruh Semenanjung Malaysia dijangka akan siap sepenuhnya menjelang Disember 2016. Gambaran pertama bagi HIP 1 dijangka akan direalisasikan pada bulan November 2016 apabila permohonan untuk pendaftaran perniagaan dan pelesenan boleh dilakukan secara dalam talian melalui Gerbang Digital Kerajaan (*myGovernment Online Services Portal*, MOSP). Memandangkan ini merupakan projek besar, integrasi keseluruhan perkhidmatan dalam talian akan dilakukan secara berperingkat berdasarkan tahap ketersediaan sistem di badan permohonan pendaftaran dan pelesenan.

Sementara itu, **Program SME Investment Partner (SIP) – HIP 3** dijangka akan bermula pada hujung tahun 2016 apabila SME Partner dilantik dengan modal permulaan RM15 juta daripada Kerajaan. Manakala, inisiatif sokongan untuk mengukuhkan pelaksanaan program-program berimpak tinggi dalam mencapai matlamat Pelan Induk PKS sedang dilaksanakan dengan kemajuan dalam bidang pembaharuan dasar, pembangunan modal insan dan meningkatkan kemudahan dalam menjalankan perniagaan.

## INISIATIF UTAMA PEMBANGUNAN PKS DI BAWAH RANCANGAN MALAYSIA KESEBELAS (RMKe-11)

Di bawah RMKe-11, penekanan diberikan terhadap empat bidang utama iaitu, produktiviti, inovasi, keusahawanan dan keterangkuman dijajarkan ke arah mempromosi pertumbuhan, daya tahan dan kemampuan PKS dalam menangani perubahan ekonomi. Di antara inisiatif utama bagi PKS di bawah RMKe-11 adalah:

**a) Pembangunan modal insan**

- Latihan semula & latihan peningkatan kemahiran melalui Latihan dan Pendidikan Teknikal Vokasional (*Technical Vocational Education & Training, TVET*);
- Memberi insentif kepada industri ke arah penjenteraan dan automasi;
- Melaksanakan Sistem Upah Berkaitan Produktiviti (*Productivity Linked Wage System*);
- Melaksanakan program pensijilan untuk mendorong PKS melatih pekerja;
- Melaksanakan program latihan berkaitan pengurusan perniagaan moden; dan
- PKS memberi dana bersama kepada sarjana tempatan bagi mendapatkan bakat cemerlang.

**b) Pembinaan Kapasiti**

- Meningkatkan skala melalui perkongsian dengan syarikat besar atau membentuk konsortium pelbagai disiplin untuk pembidaan projek antarabangsa;
- Membentuk konsortium pelbagai disiplin bagi pembidaan projek Kerajaan; dan
- Mengembangkan konsep kilang dalam kilang supaya PKS beroperasi dengan menggunakan kemudahan syarikat multinasional.

**c) Inovasi**

- Meningkatkan skala platform seperti AIM-Steinbeis, SIRIM-Fraunhofer, Jaringan Penyelidikan Awam Swasta (*Public-Private Research Network, PPRN*) dan PlaTCOM Ventures Sdn Bhd; dan
- Menubuhkan usaha kerjasama penyelidikan dan pembangunan (*research and development, R&D*) serta reka bentuk dan pembangunan (*design and development, D&D*) bersama syarikat multinasional (*multinational corporations, MNC*), syarikat besar dan PKS.

**d) Akses kepada pasaran**

- Menggalakkan PKS untuk memanfaatkan peruncitan dalam talian melalui e-dagang dan e-pembayaran;
- Mengenakan syarat yang lebih ketat kepada syarikat multinasional bagi menggalakkan mengambil sumber input daripada PKS; dan
- Memperkuatkukuhkan Program Pembangunan Vendor.

**e) Pembiayaan**

- Menubuhkan panel bebas yang terdiri daripada pakar untuk menilai projek perniagaan dan inovasi;
- Menyelaraskan prosedur pinjaman, mengurangkan permintaan bagi cagaran & menjana keuntungan daripada harta intelek; dan
- Memudahkan proses bagi mendapatkan pinjaman melalui program PARTNER.

**f) Pembangunan Teknologi Maklumat dan Komunikasi**

- Mempromosi e-dagang, servis awan, aplikasi & perkhidmatan IoT, e-pembayaran dan pendanaan masyarakat (*crowdfunding*);
- Menawarkan program *on-boarding* kepada PKS, termasuk platform bagi perniagaan dalam talian;
- Memadankan syarikat yang baru memulakan perniagaan dalam bidang ICT dengan memberi dana dan rakan teknologi yang berpotensi; dan
- Menghubungkan usahawan dengan syarikat besar melalui platform digital dalam telecentre.

## Kejayaan Utama Pembangunan PKS di bawah Rancangan Malaysia Kesepuluh (RMKe-10)

### Teknologi dan Inovasi

- Penubuhan agensi khusus seperti AIM, YIM dan Majlis Sains dan Penyelidikan Nasional bagi memacu program inovasi.
- Penubuhan agensi pengantara seperti PlatCOM Ventures dan Steinbeis Malaysia Foundation bagi meningkatkan kerjasama dan menyediakan khidmat nasihat bagi PKS dan penyelidik.

### Pembangunan Modal Insan

- Dana Pembangunan Kemahiran diperkembangkan pada tahun 2011 dengan menawarkan pinjaman kepada pekerja bagi tujuan peningkatan kemahiran. Sehingga 2014, dana ini telah memberi manfaat kepada 3,424 orang pekerja.
- Program peningkatan kemahiran pekerja syarikat PKS telah memberi manfaat kepada 32,850 pekerja pada tahun 2014.
- Transformasi pasaran buruh melalui Perintah Gaji Minima yang bakal memberi manfaat kepada 1.9 juta pekerja.

### Bumiputera

- Sebanyak 413,278 usahawan mendapat manfaat daripada RM8.6 bilion pinjaman daripada Amanah Ikhtiar Malaysia dan TEKUN Nasional.
- RM495.2 juta bantuan kewangan kepada 760 PKS Bumiputera daripada MTDC, MAVCAP, MDV dan MDEC.

### Perusahaan Mikro

- Purata pendapatan isi rumah bulanan bagi golongan B40 meningkat kepada RM2,537 pada tahun 2014 (2009: RM1,440).
- Sebanyak 1,726 inkubator GIATMARA telah dibangunkan
- Lebih daripada 16,000 usahawan menyertai pelbagai program bantuan.
- Program keusahawanan dan latihan kemahiran bagi komuniti India miskin yang telah memberi manfaat kepada 167,500 individu termasuk golongan belia.
- Sebanyak 10,812 belia telah menyertai program keusahawanan seperti Program 3K, Belia Bestari, Capaian Usahawan dan Perkongsian Pintar Usahawan Belia.

### Liberalisasi dan Pembaharuan Kawal Selia

- Sebanyak 18 subsektor perkhidmatan telah diliberalisasikan pada 2012. Usaha ni telah membuka sehingga 100% ekuiti asing dalam subsektor pemborongan dan peruncitan, penjagaan kesihatan, perkhidmatan profesional, perkhidmatan persekitaran, telekomunikasi, kurier dan pendidikan.
- Akta Persaingan 2010 yang berkuat kuasa pada 1 Januari 2012 menyediakan rangka kerja pengawalseliaan terhadap amalan anti-persaingan seperti maklumat kartel serta perjanjian mendarat dan menegak.

Selain itu, SME Corp. Malaysia ditugaskan untuk menyelaras inisiatif keusahawanan bagi isi rumah bahagian 40% terendah (B40) melalui kerjasama dengan pelbagai Kementerian dan agensi. Inisiatif ini akan dilaksanakan bagi mencapai objektif:

- Meningkatkan saiz masyarakat kelas pertengahan;
- Meningkatkan penggunaan ICT;
- Menambah baik bantuan kepada keusahawanan secara bersepadu; dan
- Meningkatkan produktiviti dengan mempromosikan penggunaan teknologi moden.

Kumpulan sasaran bagi inisiatif ini akan meliputi usahawan B40 di kawasan bandar dan luar bandar, Sabah dan Sarawak, golongan belia, wanita, Orang Asli, pesara dan orang kurang upaya.

## PKS DI BAWAH BAJET 2016

Pada 23 Oktober 2015, Kerajaan telah mengumumkan Bajet 2016 dengan peruntukan berjumlah RM267.2 bilion. Bajet 2016 menyokong pembangunan jangka panjang PKS dengan jumlah peruntukan sebanyak RM9.5 bilion, termasuk RM107 juta di bawah Pelan Induk PKS bagi meneruskan pelaksanaan Program Berimpak Tinggi. Peruntukan Bajet termasuk:

- Meningkatkan akses kepada pembiayaan dengan mengurangkan kos dana melalui skim patuh Shariah;
- Membangunkan keusahawanan;
- Menggalakkan transformasi automasi dan teknologi;
- Memodenkan perusahaan mikro;
- Memformalkan sektor pertanian melalui pendaftaran Cukai Barang dan Perkhidmatan (GST);
- Pengantarabangsaan PKS dan syarikat peringkat pertengahan untuk menjadi juara antarabangsa;
- Pengkomersialan produk R&D terutamanya yang memberi manfaat kepada PKS, belia dan kumpulan 40% terendah dalam piramid pendapatan; dan
- Pelbagai insentif cukai diberi bagi menggalakkan aktiviti R&D (potongan cukai berganda) dan menggalakkan eksport (pengecualian cukai sebanyak 10-15% ke atas resit eksport)

Inisiatif di bawah Bajet 2016 adalah sejajar dengan hala tuju RMKe-11 dan matlamat Pelan Induk PKS, di samping mengurangkan beban PKS dalam keadaan ekonomi semasa. Dengan mengambil kira perubahan keadaan ekonomi dunia dan domestik, pada 28 Januari 2016 Kerajaan telah mengumumkan pengubahsuaian Bajet 2016 yang memberi tumpuan terhadap dua tunggak utama iaitu, memastikan ekonomi kekal pada trajektori pertumbuhan yang kukuh untuk melindungi dan menjaga kebijakan serta kesejahteraan rakyat.

Secara keseluruhannya, langkah yang diumumkan di bawah penyemakan bajet terkini akan menyokong aktiviti pembangunan PKS dengan mengurangkan impak daripada cabaran ekonomi semasa. Langkah-langkah bagi meningkatkan aktiviti penggunaan swasta dan aktiviti pelancongan akan mempunyai kesan berganda dalam meningkatkan permintaan terhadap produk dan perkhidmatan PKS. Pada masa yang sama, langkah ini bertujuan untuk memastikan perniagaan yang berdaya maju akan kekal dan berkembang melalui penstrukturkan semula pinjaman dan mempunyai akses kepada pembiayaan; pengurangan kos menjalankan perniagaan serta meningkatkan akses kepada pasaran termasuk membolehkan penembusan kepada pasaran ASEAN. Langkah-langkah ini seharusnya dapat membantu meningkatkan daya tahan keseluruhan PKS untuk terus bertahan dalam keadaan yang mencabar.

## INISIATIF LAIN BERKAITAN DENGAN PKS

### i) Banci Ekonomi 2016

Jabatan Perangkaan Malaysia (DOSM) sedang menjalankan Banci Ekonomi 2016 bagi tahun rujukan 2015. Pada April 2016, DOSM telah mengedarkan soalan kaji selidik kepada 700,000 usahawan berdaftar, syarikat dan perniagaan yang beroperasi dalam sektor pertanian, perlombongan & pengkuarian, pembuatan, pembinaan dan perkhidmatan (tidak termasuk perdagangan pengedaran) melalui pos. Data yang diperolehi daripada Banci ini akan memberi manfaat kepada pelbagai pihak berkepentingan seperti berikut:

<b>USAHAWAN, SYARIKAT DAN PERNIAGAAN</b>  <ul style="list-style-type: none"> <li>• Mengenal pasti struktur industri &amp; trend produk</li> <li>• Memantau perubahan corak &amp; pertumbuhan trend bagi pelaburan masa hadapan</li> <li>• Membuat pelan perniagaan &amp; keputusan</li> <li>• Mengukur prestasi perniagaan</li> <li>• Membandingkan operasi perniagaan dengan norma industri</li> </ul>	<b>PERSATUAN INDUSTRI DAN DEWAN PERNIAGAAN</b>  <ul style="list-style-type: none"> <li>• Memahami dengan lebih lanjut struktur industri</li> <li>• Berkongsi maklumat berkaitan industri dengan ahli</li> <li>• Membantu perniagaan dalam pelan pemasaran dan pelaburan</li> </ul>	<b>KERAJAAN</b>  <ul style="list-style-type: none"> <li>• Mengenal pasti sumber pertumbuhan baru ekonomi</li> <li>• Merangka program dan dasar ekonomi nasional</li> <li>• Menilai pelaksanaan dasar pembangunan nasional seperti ETP, RMKe-11 &amp; Pelan Induk PKS (2012-2020)</li> </ul>
---	--	---

Selain daripada mengemaskini profil PKS, Bancian ini juga bertujuan untuk melandas semula KDNK dan indeks ekonomi yang lain (Indeks Pengeluaran Perindustrian, Indeks Perkhidmatan dan Indeks Harga Pengeluar) serta penyusunan Jadual Input-Output dan akaun satelit.

## ii) Levi Baharu untuk Pekerja Asing

Semasa pengubahsuaian Bajet 2016, Kerajaan juga telah mengumumkan beberapa langkah berkaitan dengan levi baharu untuk pekerja asing, antaranya:

- Menyelaraskan pengurusan sistem pekerja asing dengan mengelompokkan levi kepada dua kategori sahaja (tidak termasuk pembantu rumah);
- Melaksanakan Program Penggajian Semula dengan mengeluarkan permit kerja yang sah untuk Pekerja Asing Tanpa Izin (PATI) bagi memenuhi permintaan industri; dan
- 30% daripada sumbangan levi daripada HRDF berjumlah RM200 juta akan digunakan bagi meningkatkan kecekapan dan kemahiran pekerja (termasuk pekerja yang diberhentikan) melalui latihan semula dan peningkatan kemahiran.

Berkuatkuasa 18 Mac 2016, levi baharu bagi pekerja asing telah dilaksanakan:

Levi bagi Pekerja Asing	Kadar Lama	Kadar Baru
Pembuatan	RM1,250	RM1,850
Pembinaan	RM1,250	RM1,850
Perkhidmatan	RM1,850	RM1,850
Perlادangan	RM590	RM640
Pertanian	RM410	RM640

\* Kadar adalah bagi Semenanjung Malaysia sahaja

Perbezaan pada kadar kenaikan mencerminkan pendapatan atau insentif yang ditawarkan kepada pekerja dalam sektor tersebut. Di samping itu, semakan semula Gaji Minima bulanan sebanyak RM1,000 bagi Semenanjung Malaysia (daripada RM900) dan RM920 untuk Sabah, Sarawak dan Labuan (daripada RM800) berkuat kuasa pada 1 Julai 2016.

Negara sedang bergerak ke arah guna tenaga penuh, kehadiran pekerja asing adalah penting dalam menambahkan tenaga kerja bagi menjamin peningkatan kejayaan ekonomi Malaysia. Namun begitu terdapat keimbangan bahawa kebergantungan terhadap pekerja asing akan membawa keburukan dalam jangka masa panjang kerana kebanjiran pekerja asing mencegah firma daripada melabur dalam proses automasi

dan penjenteraan operasi mereka seterusnya mengekang usaha produktiviti. Tumpuan dasar pada masa kini adalah ke arah pengurusan pekerja asing yang lebih baik serta memastikan bilangan dan kepelbagaian kemahiran pekerja asing yang sesuai. Pada masa yang sama, Kerajaan sedang mengkaji pemberian insentif kepada firma agar beralih ke rantaian nilai yang lebih tinggi dan meningkatkan produktiviti melalui program sokongan dan kemungkinan juga langkah cukai.

